

prehendere in hoc decreto, ubi de peccato originali agitur, Beatam, & Immaculatam Virginem Mariam Dei Genitricem: sed observandas esse Constitutiones felicitis recordationis Sixti Pape Quarti sub pœnis in eis Constitutionibus contentis, quas innovat.

Pius Quintus in exordio Constitutionis 114. datæ pridie Kalendas Decembris anno 1570., quæ incipit, *Super specula*, Considerans non sine animi sui dolore (hoc est exordium prædictæ Constitutionis) quosdam diversorum Ordinum Regulares, Clericosque seculares, omiſſis, quæ Divina Majestatis gloriam, & Sanctissime Dei Genitricis, aliorumque Divorum venerationem, atque fidelium pietatem promovere poterant, quod Apostolus in quibusdam arguit, languent circa questiones, & pugnas verborum, ex quibus oriuntur invidia, & contentiones, ceteraque vitiorum monstra, potissimum vero, cum de gloriose Virginis Mariæ Conceptione sermo incidit, tam pertinaciter pro alterutra parte contendunt, ac si de illis dogmatibus esset, quæ corde credere ad justitiam, ore confiteri ad salutem necessarium est, innovat prohibitionem Sixti Quarti probatam a Concilio Tridentino, & verat de Conceptione Beata Virginis disputari in popularibus concionibus, vel ubicumque promiscua virorum, & mulierum multitudo convenire solet, aut de ea vulgari sermone scribere, & dictare sub pœnis &c. Permittit tamen de ea in Academiis discutere, & Capitulis Generalibus, aut Provincialibus, ubi scandali occasio non adfit.

Paulus V. ut sedaret contentiones, & rixas non sine offensa, & scandalo plurimorum exorras, & in dies crescentes, edidit Constitutionem anno 1616. die 6. Julii, & est 97., quæ incipit, *Regis Pacifici*, in qua confirmat Constitutiones supra dictas Sixti Quarti, & Pii Quinti, & transgressoribus auget pœnas. Quia tamen dissidia adhuc increbuerant, in alio decreto relato in sequenti Gregorii XV. prohibuit, ne in quibuscumque actibus publicis quis audeat asserere, Beatam Virginem cum peccato originali conceptam fuisse.